

梅
花
草
堂
集

梅花草堂集卷之八

吳郡 張大復 著 閩人 朱漢徵 較

告文

故侯王松筠先生祠告文

高高綽楔没于潦湍喋喋佞詞正于其官孰使再世
民心不寒侯去五紀再祠江干公子來思堵如擁觀
老婦稚子式舞且嘆有結髦者僂跪臺端編蚨而泣
清淚潛潛曰毋遺命侯卹汝孱沙積此蚨祝侯名山
毋願未畢我髮既斑觀者欷歔公子淚爰刻髓之德

百世不阮亦有。詔思不如其刊我告侯祠異世一錢
愧彼鄙夫滿載生還

故侯聶化南先生祠告文

生不佞侯沒告其祠惟口有心豈以侯私侯如夏日
不慄而威萬貨訢遂橐鑰于斯惟民生脆歎美是思
不見良苗炎熱乃滋我觀侯德循良之師剔蠹去蠹
暢條達枝雖有至人不諱曹隨黃州之政一以貫之
桐鄉有俎爰在東隅日出杲杲永其暉明德惟欣
侯其禱而

故侯樊玄之先生祠告文

我不識侯必侯之旨厥有智評亦季觀止于以味之
爰刷其羽我不識黃必黃之水厥有寒泉瀚然而起
予以漱之爰芬其齒惟菓有巢惟蒙有祀採之啜之
予以祀侯于山之趾

又

侯去桐鄉十有四祀民奉嘗侯一念至此匪侯爲神
惟民爲子某斷予足百事止止心之愴矣惟侯是社
薄言將之婁江春水雷陽之竹林植互倚蔽蒂甘棠

雪花如綺

又

川原紅綠莖萼暮春捲春絡帶各展其親邦有美執
我思令人彼綜綜者誰長其身暨予野老黃髮猶存
惟侯之德休養生成億萬斯年雨露如新喬松在望
篔竹千尋偃倭得祀事侯如生

故司李史衷盟先生告文

官廉如水如婦人貞行其常然匪震于鄰我觀史公
廉胡可能公心皎日公義秋旻吾不能言言其死生

蓋自公疾聞之人云僚長來視黥冷無薪請見二孤
孤跣而衿身無表衣遙拜于門同寅掩涕涕地失聲
蒼頭鼓篋若揮虛塵檢衣視殮周以朝紳嗚呼即公
無家當不赤身君子固窮墨吏賣貧如公之廉惟恐
有聞昔沈裕州謂公真清吾友欽子不妄與人清強
有守可勒公銘

雪浪應洪公講師告文

昔轉法華義不深了雪公升座始聞權巧權巧伊何
一月拍標喻淺出深深乃可討六種震動渴仰相好

譬如群兒火宅中逃急則驚仆三車乃飽御以狎人
兒亦終擾我承師旨草堂清曉直指心印刪蔓前篠
復向我言聊試爾道乃知佛法如日皎皎法亦無車
誰爲大小攝山之原有章有表慈音勝稍無非藥草

牛山古松禪師告文

我本世人多淫爲苦聞有無漏面如泥土以我慚愧
未尼犁伍故嘗叩師師印之可師叅二室願授戒譜
乃付庫錢觀師何吐亦以慙故得此勝果因地不真
摠屬誑語如來勝相紫金光聚阿難起教亦復如是

破龍山無着長老告文

我昔入山談笑甚舒夜聽鼓鐘朝聞木魚今來寂寂
不見籃輿有大寶塔擁雲而居我拜稽首龍去款啟
憶昔治裝阻雨小需山暗木昏俯檻躊躇公曰無牽
水到則渠故常知公決裂丈夫一針投芥色意都娛
此來我情去住本無

天台洞十長老告文

師來天台威儀楚楚杖錫披衣不邀伴侶三千律文
科條旁午一念攝之大時淨土問師何爾師淚如雨

龍象難馴伎倆易吐故嘗語予華頂之阻上有崇巖
其人神武囚鎖知見超然自許宕之跌之終罅其所
以此心猿葉鳥可數予聞爽然稱爲戒祖長生慚恨
調御則可人亦有言惟學在忤彼具足者非具足伍
赤城雲開有門有戶錫躍爲龍得羅漢果

興福寺鉢菴長老告文

性愛丘山貪其法侶無師既寂鉢老常住能以方便
拔諸毒楚我受師勅取材于土播之揚之既禱既杵
既浣未飾師德已古明告世人貪生何補我來自南

歷階排戶潭影悠悠依然龍塢不見鉢菴于是馬取
玉柱塔性公長老告文

我婦自虞緇白旁午曰性公寂而鼻垂柱端然而面壁
無寂滅苦我聞是言拭淚而舞世外之交久莫公伍
既四十年不昧因果如佛所說宜其輕安者春見公
公現疾吐笑執吾手不食故可玉柱撐天故雖守土
我曰忘之浮圖自古今我來思佛火當戶爰視龕名
第一代祖曠音之夢公袒不履天樂繽紛曼陀花雨

馬鞍山玉林道人告文

道人如鶴長巢松嶺玉立飄鬚刷羽顧影俯視雲容
矯然延頸獨往獨來精進勇猛予揖就之爲設胡餅
道人曰嗟爾目乃青何不歸來觀心對景爲分半榻
龕燈耿耿顧取長筵爲予馳騁松亦生濤冷冷雪郢
道人曰嗟日中于丙俄焉西側山風夜冷蒼蒼莫烟
不分萬井此茫茫者可憐土梗而我此身乃在其頂
豈無他山可以振領疊躋十圭晨昏自憬擾擾萬念
無不可省我觀道人既閒且靜厖眉皓齒雙眸烟烟
和衆作務是法平等鶴夢松摧得無生忍嗚呼山不

在高有人則韻致不在遠會心則永人之往矣使我
心哽夜起松風謾謾洗洗

告西寺僧見玄文

聲聞非一師出其聰是非雙遣羊吼如蠓如蠓匪刃
有入則通悲啼喜笑如穴受風我昔遇師于西林鼓
師知我盲我識師聾我以耳在猜呼得公公亦得聲
起舞月中同病必憐根則玄通故知釋氏情與人同
詎謂盲者師情微鍾一言之好實銘厥衷師今往矣
我心則洞馨爐致詞歡解情空他年法會一笑相逢

武部邵堦蓮先生告文

遼東豕突克語戎兵邊防侃侃曰邵先生先生之學
茹古吐今淵源庭訓是翼是承先生談笑石城山前
墜塵橫拂可愕可聽憶昔邂逅河渚班荆公亮虛左
右接仲醇永夜清歡佛火燐燐傾蓋既故懋籍彌新
蕉花共賞玉笋徐斟雨或命履宵必張燈意氣方橫
龍去鴻冥有不亡者先生之神湖田秋水南蕩冰葦
虎橋夜月桃澗春雲幽人從來於惟先生

亡友邵茂齋告文

我于同人交兄差晚相視之知一笑自遠我悶不食
必就兄飯藉其開霽較愁正反兄命我遊我趾連蹇
強及翠微兄笑其蠹世人慕兄何止琰琬但無此人
歡情莫挽庚戌之秋見兄北苑相如雖病顏色宛宛
惟山有柎兄坐不偃質明同舟予于辭援手物夫容
還滋九畹薄暮簷前深深繾綣握手後期兄若自忖
我曰不然豈有人損天其福人載笑載導自兄之沒
我舌常寒寂寂初平誰者為院

亡友顧朗仲告文

公有嗜癖千秋祝予穉斬刺鉛掀髯而誦我寔愁公
見亦無語拂面藤花金紫屑雨右手投壺左挈天女
落落穆穆鍾期心許月不造公籃輿相取我視公疾
陽月之五以手捉公肌如火聚口噤不張五內俱楚
往訣孺和痛其焦土季思亦然又見顧虎首身莫贖
溪水濺怒藤亦悲號虬龍窟伍人琴俱忘次寥終古

亡友欽愚公告文

嗚呼人心不白意氣都浮背尾不貫博雅多幽我儀
圖之邈焉寡儔直亮多聞兄也其尤兄所緩急宿喏

不留傾困倒廩憂人之憂兄所擘畫蕩蕩可由源分
派析各嚴其求人憚兄謹密挑冷擊或設之矛兄意
坦然豈以爲仇人喜兄俠山水彌連或騁之遊兄操
凜凜必夸其修惟兄所止千里慕義馬駿船樓惟兄
柔遠一人當閔鼓亮角道今其往矣寥寥寂寂雨暗
風愁嗚呼兄筆如椽無言不酬惟意所適纒纒不休
皆有妙義匪夷所侔兄情如水無絕不流備諸款曲
至剛而柔人所落落兄所綢繆嗚呼我來視兄于江
之婁執手相視步步踟躕白民來訃于歲之秋高堂

慟哭水覆不收光其往耶南山桂發千載悠悠

亡友傅子晉告文

太阿之劍光寒秋水夜起龍吟鐵花浮紫五丁掣電
躍入深底終化爲龍觀者驚泚子晉蚤達妙有手指
有物妬之豈曰人死故嘗揆冊稱御史旨御史呼前
中越一紙歸語所親吾神眊矣在昔癸巳賓筵集綺
既夜告歸孟夙曰止吾友子晉今之荀子五年莫逆
是此夕始春霜殺花偏妬共盡人曰不亡龍光夜起

亡友王祖玉告文

我齒既豁我釜既塵人所同去兄念轉親人曰袒王
王公之孫個儻任俠妙才寡隣我從兄遊轉得兄神
我昔誤書眊類郢人公笑勅還同坐莫偵兄昔造我
必誠小丁叱奴匿車酒則汝巡誰能統綺諳曉苦貧
誰能齟秀護彼眊昏我車過婁步步傷心徬徬音容
永巷將迎昔贈我壺刻曰時彬瑩潤無瑕襲之重裊
庶幾半臂裊也如新與王俱碎腹痛誰陳

謁龔安節先生祠告文

先生之風隱于晉陶先生之節彰于魏朝有詔特祠

某也垂髫晚交名喬備諳芳標濟世有餘俛而爲超
君父不天赴義如招我拜先生乙卯春杪鹿城之南
木秀山高此中有人過者勿佻

王世周先生告文

尼父刪詩其經曰葩宋人無色其道轉涂嘉隆七子
剗靡振華夫子成之卓爾大家昔有寶蠟名曰莸花
入水瑩然流爲茜霞我呼似公文無非耶公纓索絕
拊心曰嗟我觀夫子其人亦那山林成市鷗鳥蠻蝸
快氣怒騰燕月胡沙小雨花筆熱火煎茶義所不載

捉肘搔爬提鼻忍息毋缺我鈇保身明哲夫子之厓
孰知其然其詩不誇帝旁工女雪膚捲紗麗則絕麗
遐則轉遐我醉夫子笑倚蕪葭

亡友關允揚告文

嗚呼喬公鷄黍武也永思簞簞噴飯蘇子哭時友朋
歡笑莫覺莫知覆爲悲哭今古同之惟吾與兄惘惘
相隨困不得意聊試共而後境轉窮雙鬢漸絲始知
前路此樂已奇况隔死生分手永離願言同憂後復
可期嗚呼壬戌之歌赤壁有詞發音清峭怖其小兒

木末亭遙古剝有碑暗中試索集爲譚詩兄能憶否
爲進此卮

凶友王伯符告文

其惟托筆霧涌泉來其惟掩塵鼓譟角哀座惟匪兄
目豁心開人之云亡亦已焉哉憶我哭兄北山之隈
生氣宛宛咳口欲恢憶我識兄南湖之涸扁舟笑傲
江標有姦兄惟先潔五臟皚皚強力壯色孰意其灰
兄家忠孝門有三槐既德既滋孰覆其栽度城之偏
寂寂夜臺言邁其野散步而回

亡友王孺和告文二首

千秋莫逆必稱子期高山一曲今古同悲蛙缶送奏
雖多奚爲乃知石交不在駢枝憶昔與兄同業相規
兄諧我謹我率兄夷握手道故合併以時有往必告
無遊不隨三徑花開爲我啟扉宵必張燈酌彼醇醪
茶鐺未響爲君熱炊七碗既沃縱帙獵竒夏逐涼風
欣賞黃鸝秋泛明月綠水漪漪笑味百年捫心共期
茫茫人世有物妬之黃炊未熟江蓴正肥兄辟火食
忽見飛衣嚙管鳴嗚帝子來思白玉樓成召兄作詞

攄木而吟絃咽聲淒伯牙雖在期神則遺再鼓再絕
兄乎來歸

氣類之感言不可傳譬之元神漠漠綿綿去之則痿
得之則鮮鮑子知我伯牙絕絃此四人者嘗游其天
嗚呼孺和我見其然載啟問之豈以我偏同志相劇
君穎我邇同病相促我後君先良玉易割頑石比肩
是義不一胡爾彌連嗚呼孺和通眉長爪細瘦如仙
年未知命十載長眠珠璣錯落如大寶舡殮不覆肘
四壁長懸婉婉疊疊談笑可憐天阨之疾喉舌生烟

斯世共駭我意則全嗚呼孺和七尺之身孰短孰延
千秋之事孰脆孰堅物忌多取速肖者賢嗚呼孺和
豈以我偏

亡友婦季思告文

天之君子其名爲真人之君子其名爲清清兮真兮
吾見其人季思蚤歲如日之升紅芒映徹秋水潏潏
一朝超悟去智去名載糗入山九食三旬人口太嚴
毋瘠其身季思唯唯內景常新乃圖尼父燕燕申申
梅花破藹寒徹乃榮寶刀煉鏗不以析薪龍卧于野

為壇為林過者式之清遠先生

職方柴旋甫告文

職方名族。奮孤貧。錦衣拜母。袷朝紳。贏金不簪。
手奉其兄。兒自有官。無憂母心。門辭憲臬。高會故隣。
是義卓犖。匪夷所親。朝揮弁橐。甫夕而寘。里訛十日。
愛欲其生。有鑷者言。侍公于辰室。無餘席藉。床以薪。
嗚呼。職方豈今之人。世無男子鬚眉。則名如公。廉義。
卒奪其身。我匪私公。旁觀者清。沒祭于社。允式後塵。
故瑞安令王兄告文

先子善鑒得兄制時曰其三人則予忘之顧謂小子
此刻秀姿一割成名吾無敢私乙酉之役兄薦南闈
二十八載試縣有司冰冷霜嚴吾所不知瑞人至止
劇有口碑吾識其小令人可思兄置華屋卜日而移
先其尊殯奉之中隅家人勸阻公奮不違色養大母
至于耆頤喪莫凜凜悲戀如兕昔有土著以公爲師
貧甚自匿紡絡江隈翁具盛服手進之卮吾能憶公
今花甲期嗟乎此邑屋人所必不爲瑞故巖邑豈無
大資一禮婦來祭弔寂而以此思兄刻秀可推

表弟許宿如告文

三世中表載媿朱陳親故彌加惟我三人世長之喪
君哭之辛我痛方割不知其深人曰異哉宿如忽忽
若震於隣我殯世長君幸過臨十步九頓滿面灰塵
望見驚愕不知自君惟君與我起家孤貧君意急急
當念聿新我心不然有物限之徒瘖其身未久君病
相對輒云嗚呼生死之數不在精神即君自達寧免
無生即以勤瘁亦匪人因君昔在病百八十旬世長
旁駭慄如春冰霍然頓起揮染紛紜君客海上世長

待暝相向而哭惟吾與君今君往矣我影隨形蕭蕭
短髮殊少心情嗚呼哀哉君夢既覺是否六親世長
在耶應笑吾存

亡友張行可告文

人死曰歸不知何所有室有堂有廡有戶是則可歸
否者誰處有賓有朋有婦有伍是則可歸否者誰與
我聞夜臺臺於何土行可韶秀非類不聚同道爲朋
今焉奚取行可高華雅難甘苦如意指揮今焉誰矣
春雨有軒梅花有塢夾道有桐觀蓮有墅敏視溫容

雅步軟語爰殯江干瀟瀟暮雨束芻楫詞嗟嗟行可

沈元澄哀辭

維萬曆三十年冬十一月三日是爲仁兄沈元澄窀
窆之期其歲壬寅其月壬子其日庚申其教下第張
大復束芻酌酒寫我哀思其詞曰痛哉我兄之死也
光明磊落之度飛揚踔厲之才軼群絕倫之志發憤
忠益之辭談笑胸開排盪氣振有骨非賤無病長貧
人之君子今之古人憶與兄交歲在癸酉白門把臂
倚馬數言兄不恨予之無賴予不驚兄之過方雅操

相先務存古道奇文共賞誓不後人或兄俞而我吁
如虎之爭不必上殿或我嘲而兄哂同心之議利于
斷金兄涉西岡吾先布席我泛黃潭兄蚤迎門村上
花開時時斑荆道舊酒後耳熱行行措足溝中投壺
角奕我讓兄才冷擊微言兄饒我興樂此未歇瞥爾
幽明依依夢裏相逢幾回頽眉可見漠漠寒泉未曉
終是彷彿難憑時聞古木悲號意者金石之章聲聲
嗚咽陟看秋鷲奮翮應知白雲之義片片天飛怪風
凌雨還疑戟髯談心瑞靄祥雲豈是橫經論道忽忽

數載悠悠我思所恨墓木若拱貧無短劍趣此芊草
未宿畧嘔寸心悶書客問羨兄正性結爲大年傳寫
兄神笑我後死何不速滅白眼問天昔胡調高之無
和倚風長嘯今胡仁壽之不然又况乎突冷如斯伶
仃似鄧長賚壯志欸欸下泉獨抱孝誠陶陶永夕征
雁嘈嘈淚洒空幃孤影寒枝瑟瑟血染江上丹楓吹
旄風酸歌挽聲死一杯之土既覆化碧之日何年夜
雨傷神空山寂寂土高凝秀正氣漫漫兄事既終而
我何待喬公車過之痛步步斷腸蘇子篔竹之感葉

葉成血呆不解彈有絃亦絕何處無笛那忍再聞

居玄嶼哀辭

山林之性見人則驟野苑之質不擾於原故徜徉非
聖托盲非真米顛盡舡于書中狂衡槌鼓以自斃絕
代異人風斯邈矣若夫喜怒哀樂不知所措恣口傾
倒其意云何挈手行游瞥然而去吐舌陳義俯首便
眠人莫能解彼亦不知昔者吾友嘗從事焉故長洲
散人居玄嶼名懋時外形放浪中心混然挾絹素以
東遊儻數屢而至止寒蛩四壁殘書攤案濁醪晨引

松枝夜燒興有所至時同千里之彈琴意見暫偏輒
如立本之伏匿漫罵王孫非關醉酒大笑欲絕不必
賞心持縑祈請漫擲襪材窘市肆中人爭葵扇狀似
野鹿心實寒灰飲如吸川嘯逾鼓吹咄哉若人可謂
犯人之形無人之情任天之放不知天之樂者也時
惟冬月酸風裂鼻敝裘無暖足指欲穿搔首西望薄
游故園忽膺二監不及迴轅嗚呼哀哉床頭無火被
不覆足兩目猶張顏色如故婦子牽挽哭聲泉沸啟
視手足一笑而瞑嗚呼哀哉頽突烟冷雲釜塵生胤

嗣僅延蔡女未嫁子畏蹶死吳趨公望沉魂鄧浦滢
滢數子夫子兼之嗚呼哀哉世上畸人其有恧乎

許表叔丹山哀詞

日旭月朗樹暗草鮮四時代謝朝絲暮絃吁嗟先生
吾見其樂不見其憂也醉墨淋漓長歌俏特左對青
山右擁趙女吁嗟先生吾見其壯不見其衰也板屋
淒清布衣楚楚茶煙如縷焚香夜坐吁嗟先生吾見
其適不見其勞也抱痾行吟膺墜長嘯對牀數語神
氣湛然吁嗟先生吾見其定不見其擾也一子覆衾

哭聲動地白日西匿兩孫啾啾老年兄弟執手長號
同志親賓啼眼相覩吁嗟先生吾見其生之順歿之
寧不見其無聊而怛化也閒雲自流清風如故吾每
望先生之廬而不覺其涕之零復恐以涕累先生之
魂而又恐先生鄙余小子之涕爲不知生不知死也
東芻絮酒聊叙所見于先生吁嗟先生其尚能聽余
小子之狂言也夫

大中丞支公祭文

日星分彩河岳萃靈鍾美賢杰發間於崑皇皇岷才

惟國之楨經文緯武四方以寧指數前脩可得而云
顯允我翁吾見其人昔翁振藻冠冕斯文鸚奮鵬騫
臚唱大廷為王典禮秩秩絲綸榮戚貴璫狐窟鼠奔
為國藩翰惟葉惟冰根盤節錯迎刃而分東粵之教
多士雲蒸絡繹聯翩桃李盈門文用既彰武畧攸陳
作鎮三楚熊軾朱輪褰帷仗鉞民夷擾馴播人不戢
蠶叢鳧紛帝曰欽哉矯矯虎臣乃降九服乃破黃岑
七戰塘保板角煉砮再破苦菜播功用成天子嗟咨
江漢底平爰蔭一子俾業成均輿論噍噍公若弗聞

拂衣南還載歌載欣計歲樹木樂我故園危坐却掃
孫子振振箕疇五福爰歛其純翁攸好德維福之因
惟天不僭佑命自申百年觀化于湖之濱龍旗交交
嘒鼓彭彭素車白馬如雁如雲觀者塞路必得其名
其敬恭桑梓欽矚老成載領色笑如春之溫載交賢
徇如日之升泰山其頽仰止曷勝採澗陳詞涕淚孔
零

故蕭山知縣許公祭文

惟昔肅皇暨于穆考文治式新仁賢是寶先生遘會

確玉輯藻無脛而飛廣譽獨蚤江左聲價盛于丁卯
鷹隼駕風騏驎就道排空掣電曲江春曉帝錫專城
赤子若保鑄鉞試割膽落講狡先生曰嗟辟如薙草
吾去其莠無爲皦皦予以奠之明德攸好狎鹿馴雉
懷及襁褓世路嶮巇愠于儉小蕭民無命遽逢大巧
先生曰嗟何妨顛倒羅視數澤鴻飛縹緲歸鑿頭眉
冷徹清洛千秋在茲寫我懷抱上接混茫下親魚鳥
李杜光芒落筆如掃銀鈎鍊畫蘇黃是討起視堦除
玉樹矯矯三鳳齊鳴卓哉物表先生曰嗟吾志可了

蓀蕙蘭茝衛我諼草三釜之養何如萳茆邦人仰止
既醉既飽位不酬德年不及耆有識嗟咨我心獨擣
少膺明訓居然里老氣類相看三世管鮑快覩高門
敷榮大棗絡繹聯翩驛驄裏時惟陽復搖搖丹旄
白馬夙興薤歌晨棹魂礪之原永協祥兆我思先生
玉立瓊標式翔式歆鑒我葵藜臨風酌酒其清如醪
故同安知縣柴欽父祭文

惟公文章在海內行誼在鄉評棠陰在閩安型範在
毘陵神情笑語在公之親舊而家範門輝引之勿替

者在公子之子孫之孫人既耳而目之述而揚之見
盛德之有後嘆才大之未伸予又奚得而云而予所
私戢于公望銘旌而欲涕敢以舒其未吐之情予有
女兄婦于潘氏夫婦皆亡四喪莫舉公曰嗟哉朋友
之義竟其喪具惟公是資斂斂二子惟公是依潘方
卜兆公疾垂危公顧伯子吾友襄事惟汝畢之吾友
遺孤惟汝賙之又予亡友曰沈元澄聞公奄忽泣而
無聲予問予友揮涕具言如手如足幾三十年予聞
斯語面熱欲燃交情淺薄世路險巇公念友朋及于

生死亡姊情親亡友無子述公道昭示徽美懷念
顏色痛憶老成辱交令子尚有典型抒此蕪詞以告
公靈靈輒漸遠有淚盈盈

光祿徐公伯衡祭文

公昔還朝秋月三五同遊送公于江之滸我違伏枕
既而莫吐燕吳雖隔北來多羽况公男子豈鹿豕伍
他年相待幅巾杖屨傷哉一夢蝴蝶栩栩帝錫之傳
歸蛻其里我旅甕城爲公延佇時惟夏月炎日當午
回首江臯坎坎鼉鼓童來告予有駭如舞倒屣而前

致此傷苦饒蝗塞路足不暇武載涕載零載露焦土
我哭我私公自千古公乎歸來公無世怒昔侍香案
文章繡虎淹遲赦妙兩業並譜一卧東山風流豪舉
尊菜鱸魚咸經機杼晚觀蓮社樂其緇旅陶公味道
飲酒乃許澹泊明志塵視圭組簡書督促酬知則止
天不勲遺袞職誰補人生適志公則其侶昔我侍公
引繩里處朝雨命展宵燈劇語允公所爲知公不侮
惟正惟真曾以相與公聞我言喜見眉宇數共梅花
笑影欲舞子爲傳之以供談麈我心已石懶味藻黼

正史傳公豈容我鹵念此言笑淚落如雨爰掬江濤
聊寫哀緒公後有人何憂何怙

又

嗚呼哀哉予既哭公于江之湄而侑之蕪言以致吾
私庶幾公靈其來格思而此衷隱隱痛痛口將吐而
復咽淚欲禁而先垂捫心自問則別有手足之念刺
心剜骨適感夫哲人之忽萎嗚呼哀哉惟復有弟顛
頓離披公進爲朋匪石弗移生死之誼夢猶見之哀
哀黃口培之植之某愧爲兄公則弟師故嘗懷高厚

之莫報時述義以訓兒倘芹曝之有會即不然而惟
土與木之亦或有知云胡溘露天不憖遺八駿之馬既蛻
骨而逐電青藜之火亦掩耀而弗威麒麟黃閣之老
至無所藉以爲質而寒暄後死徒率夫黃頭歷齒之
輩而陳詞嗚呼哀哉公視弟孤信可令死者之復生
第今見公亦信否九原之可期萬形等盡寸心不欺
惟真與澹公素在茲以此告公適燕以嬉我髻如童
有淚漣漣嗚呼哀哉

賀司訓元朗先生祭文

維萬曆己未十一月二十九日崑山教下弟張大復
謹以香楮清茗之儀告于明司訓元朗賀老先生之
靈曰嗚呼先生而竟長往也耶傾山倒峽之才將遂
盪爲冷風銷爲輕塵耶屠龍埒虎之膽將沸爲海濤
掣爲閃電耶析繭擢毛之識將著爲日星昭爲雲漢
耶虛空無碍之性將結爲天光融爲水色耶將乘六
氣之罡以遊無窮綸巾羽扇綵雲影裏時一見耶將
復爲志士仁人在治如鳳在亂如鳳耶凝爲石耶秀
出爲松耶春猿吟耶秋鶴飛耶是皆不可得而知而

以予所見于先生之大其氣可以撼山岳其誼可以
薄雲天其心可以質衾影白死生可割可殺而不可
辱其所不欲爲如巉崖鉄壁可以陰長士人之骨而
作之氣則予已信其傲頌之化于茲土而挹其清風
聆其雅奏于梅花絳帳之間惟恐三年有成舍之而
去而孰意其竟爾長畢也豈天之無意于斯人耶將
數之所定人莫能回而所謂天者果不可問耶將先
生海鷗一世備然而來脩然而往耶厭世去耶嗚呼
先生名滿一世不謂之無聞鐸振一方不謂之無述

祭酒名族堯李雲蒸不謂之不遭時來惟一經去惟一旌不謂之不孤特布幃瓦燈哀胤子令人人頓纓揮涕不謂之不行其志嗚呼先生何川弗逝何日弗旻何玉弗碎何木弗萎其又何憾于斯世也哉而獨以予之廢眇連蹇顛頓披靡受一日特達之知無以效尺寸于左右朔風淒緊孤雁嘹唳聽彭彭擘管之聲能無腹痛也耶嗚呼先生尚能聽予不類之狂言也耶嗚呼哀哉尚饗

譚公亮祭文

萬曆四十三年乙卯十二月初八日庚戌故譚禹紘
仁兄卒于吳門之寓寢越七日丙辰訃聞崑山友弟
張大復倉皇路哭其明日丁巳憑棺哭又二十有五
日是爲丙辰歲新正十有一日壬午率其子桐絮酒
拜奠哭而申之詞曰嗚呼吾兄淼淼濁世死何如生
兩人相問曾幾何時而兄遂返其真耶遂使病而老
者稱後死人耶嗚呼我兄朋友之味千秋之情鐵石
之腸英雄之膽壘塊不平之感瑰瓌竒怪之談笑從
此無所發吾狂笑嗚呼我兄買金結客感憤報讐折

券行義蒙垢正名寧傲王公不羞貧賤寧破血產不
逆本心寧蹈叵測不寢一諾烈烈而生烈烈而死從
此無所吐吾氣矣嗚呼我兄金谷之花平原之酒易
水之歌廣陵之散漸離之筑禰衡之鼓英雄如昔慷
慨何時從此無所壯吾色矣嗚呼我兄囊無剩錢門
多剝啄世謂之貧而繪軸牙籤連床充棟孰與兄富
一命不膺年未五十世謂之畸而有文如虹有心如
雪孰與兄貴讒口雌黃譏張同異世謂之缺而烈士
痛心賢豪流涕孰與兄榮惟是母老子弱世所共悼

我意兄心故難灰冷而祖孫相命庭內肅如由兄之
道不足成兄之孝有餘蓋疇昔之夜不佞弟嘗聞成
命于兄曰我一子不欲令更憂患但割吾產且簡吾
從異日者將遺之以安也嗚呼痛哉草堂清夜倚柱
相語風木軒前披襟解帶詎意遂成永隔也耶死何
如生何途之從再相告語耶昔我視兄笑語迎門歌
闌舞罷月落鷄鳴今吾哭兄步步傷心梅花帶雪素
影參橫嗚呼我兄哀哉痛哉尚饗

中丞李公祭文

於昭大夫惟岳惟星聲禋身度規矩準繩王善爲師
夢感攸徵服之無數可對影衾文章華國價重兩京
神祖在御首薦明廷初筮雲司協帝好生棘林夜曉
寃不覆盆廢書而嘆每求其生爰秩邦典百祀惟馨
有文不斲泰山如水椒房罷寢威晚雋雋游幸減禮
凜然格心乃式楚士乃秉浙衡七澤五湖鏡于至清
卞璞既剖心服四明署藩却羨筭器隨行荆南之役
澧水生春清浮惠標止調萬人播功無害軫翼既寧
班叱黔首僂首戶臣黔首請甲絕不與親後跣西川

始知禍萌不襲伍土國體攸尊入粵兩瑞虎而冠纓
辭揭不受制府色驚時抗左司不失和平稅額小減
吾氣自伸兩任粵裝香藥不名裊轄于東爰籍民屯
八年鉅萬允足餉兵常平既設杼軸漸盈旱魃爲雷
凶歲若登天子咨嗟節鉞是膺賜田議起藩邸虎爭
直指請孺取非其經昭陽運道梗塞爲懲中道不移
乃乞其身大夫曰嗟匪心忘君懸車之禮年至奚云
湔賦歸來槐陰滿庭既耕既獲惟善之因載捧黃麻
孺慕彌沉載祭花萼手足彌敦太史養志惟色惟勤

選嗜而進選勝而亭曲誤必顧笑語春溫爰侍賢子
爰繞文孫一篇見娛寢食味新大夫曰嗟思吾老成
乃問釣游乃訪故林橫塘集翠虎溪搖青公袍在側
杖履幅巾涉梁而嘯青山徒存顧語侍者始知年深
健步若飛驚其老氓老氓相告尚書履聲追數昔游
如參與辰大夫曰嗟詎老風塵玉山片石可養幽情
洞門式啟霍舞鹿鳴鐵遂三弄清旭東升百順揔萃
慈儉彌臻眇予小子時叩玄扃談笑斐疊川湧電奔
正骨慷慨義薄秋旻曰逸我老其惟後昆後昆繼志

善果攸存時惟菊月黃花飄英見翁里第含笑相迎
執手叙違聊述生平纏纏萬言厥用至誠訓詞盈耳
式玉式金朔風未起西墮長庚嗚呼痛哉神仙必解
佛亦現崩此理故然我復何陳念惟先誼有淚暗零
先子千秋式憑公銘驅馬西州舉策叩門大慟欲絕
聞者酸辛此義不滅明水空盛嗚呼痛哉

故大叅馬公祭文

挺挺我翁履信思順自天祐之翁處全盛六歲驚人
鋒稜脫穎應聲吐詞滇守目瞻南國多才何來神駿

程菀于鄉靈心輝映擲之無上同儕誰並咳吐九天
私淑者慶立境登朝黑頭謝政名滿中外千秋獨勁
始官于河河流不脛翁時啟閑漕使立諍翁曰不然
彼羸此病無益張秋適爲濟梗順而通之萬艘並進
乃築高堰泉脉如鏡帝念楚宮堂構是命中消計之
憚翁嚴正故高其直以邀餘潤翁色怡然消以鎮定
不日不月卿雲宮竣會筭緡錢始知臣蓋天子嘉翁
綸音煥炳徼外于宣詔恭藩政彩雲蓬蓬攬轡而詢
江山如畫南詔可靖化行三月粹中讒譖翁曰何傷

我故不競綠野堂開鷄適戲論東山匪遙弇州方近
撫掌長嘯曰有天幸泰岱鷄鳴郢中雪韻昆明之池
滄出寧晉羅而存之以供三寸所得既多夫又何恨
對客揮毫手談必竟焚膏繼晷日負日勝嶺梅澗松
千霄秀靚盃斝雲飛婆娑雙鬢世人望翁水遠崗峻
縹緲往來瀕麋矜奮但吟性情不賦天問邑有大猗
乃至饑饉燕居深念時懷感憤茹則逆予寧吐母忍
干牘之謁去馬若磷林下風清三紀一瞬堂前八龍
矯矯霞汧蘭芝有種百十其胤華祝多男誰能振振

積厚流光方來誰靳軼稀駕髦何悔何吝翁乎不亡
吾心孔震我所見翁寔非敢佞真素絕俗不禁形迹
履道坦坦不談復性衰麻殺賊自心自証翁實古人
不朽誰遜先子石交翁去則盡眇予濩落慚負翁信
未免有情臨風悲悶

陳伯玉祭文

文章九命偃蹇亦常仁者必壽百歲亦亡我所痛兄
匪名弗揚我所問天匪日弗長累鷲一鷲天翼其翔
鍛羽搏風孰知文章龍馬行空天縱其良過都歷塊

孰識騰驤兄氣如虹星斗煌煌唾落九天萬丈寒芒
少騰膠序老厄康莊里選未推溘露滾滾兄膽如雪
醉義若狂意所弗屑頃麋戟張太丘道廣桃李門墻
寸祿弗沾有美未戡兄曰嗟吁命也何妨夜起焚膏
晝檢奚囊武庫在兄爰及義方惟蘭有種惟泉流香
琥珀生脂鬱爲夜光兄志弗磨悍躍悍昌條焉聞訃
使我心傷疇縱兄才而閱其芳疇掣兄遇而晦其祥
天乎可問疇穀疇滅其味同蘭臭誼協求羊兄泛委
水三徑花黃我涉青溪載笑載觴兩世師友千古相

將皎皎心月倬彼秋霜採澗而祭淚涕徬徨

趙綸叔祭文

嗚呼哀哉昔吾與子同居邑屋于隣于比小不相識
慕尚而已甲申春夏爰客觀止兩心莫逆悔其晚矣
子多遠懷我無何以但覺相對歡情徹髓微言冷激
不頓不倚人或有言彼用口語我心自照豈好相靡
別有交情君子所履中隔城闔千里尺只積念盈抱
把臂寸畧一室虛閒跌宕文史繼以湯社踈枝冷蒞
我生薦疾子亦胡爾載往載視斯人必起我來澗州

謂子傾否歲晏而南晉陵之市忽訃歸天清淚如水
子心與口其直如矢子自尊生芥擲青紫世路淼淼
古人盡死子念未了已付來嗣素交不文告子如此
九原可作我願不泚子其鑒諸以歆我祀嗚呼哀哉
惟吾與子

顧僧孺祭文

維天啟元年正月十二日明庠生顧僧孺歿于家其
友人某弗知也越明日乙酉某婦自婁東童子倉皇
采告僧孺死矣嗚呼傷哉僧孺真棄我去爲古人耶

先是月之五日僧孺題書問梅花消息自言挾寒惡
熱昏昏如睡又先是泰昌之冬過我草堂偕入西林
小憇大樹齋畔徐步間庭仰蔭喬木當待春中携書
挾琴連牀夜話又先是長至之初予呼僧孺發金閭
循曲阿抵甕城眺望三山頓纓長嘯訪故人于蘇臺
之慧慶風雨瀟瀟洒然物外愴心動色終夜不寢羨
入山而不返訂石訐之見招一步一回爲時幾何而
今遂棄我爲古人耶憶與僧孺定交計三十年雨雪
明晦何聚弗樂何樂思歸攤書析理何奇弗賞何賞

相違觸事興懷非是是非何同弗異何異苟隨故將
爲垂老之形影阨窮之子期而今遂若此然則庚申
歲晏棹返吳閭不復同行禪堂把臂不復共語元初
數字不復題書君爲古人我爲後死者耶嗚呼僧孺
風流若狂孤憤若狷無所不涉若同無所成名若遯
而以予所見較是狷實而狂寄同少而遯多也嗚呼
僧孺嘲風弄月顧若周卽流連婦女愛若相如布衣
草履負瓢行歌放若蘓子婆娑蓮社歸而不佞達若
淵明而以予所見較是曩時一僧孺晚來亦一僧孺

也嗚呼僧孺聰明間有風流絕無疇昔春夜月落夢
回感臨川之情深詫吾輩之不沒即形化而魂徂終
影響以相悅亡何先樂後貧病自内生過庭莞爾笑
語孺人孺子近道可冠古今降心內典抽髓濯筋意
聰明之漸歛仰看青天溶溶夜月桃花流水宛纓索
絕曾何風雅之銷落也耶嗚呼僧孺世無此人我無
此友世無此人俾僧孺之奄忽而莫壽我無此友誰
堪幻形之已衰知己一人罹此陽九傷乎傷乎

王爾瞻祭文

寶刀在匣夜夜龍鳴用以屠狗其聲則暗曇花一現
六種震驚花結芻果何如春榮乃知物貴易用則輕
屠門鉛銛委地何聲乃知人道一現者靈皤皤黃髮
斯爲衆生大雅不作吾衰誰陳社有爾瞻曰斯中興
雪堂疊跬古古今今脫帽狂呼不醒不醒白眼傲睨
何愛何憎循性而發花浣蓮青頽然自放雪兒花箏
當其孤寂舉世誰親人去其奇我識其平蹄涔尺鯉
龍性難馴爾瞻之詩如日方升浴乎大海澎湃奔騰
離嶠擊水乃登青冥半海而雨方旦沉昏天乎人耶

此理孰馮我哭爾瞻別有憂咽孟夙之卽風流中絕
君不憶乎躡屩擔簦千里省父超悟無生歸爲吾言
天目之陰琅玕萬箇衣面皆青我欲從之化爲青精
用供堂衆以答嚴恩豈其隨念一往而昇將駕風電
白晝騎鯨昔觀爾瞻支撐病骨自詫夙痾憑仗參朮
庶幾君歸可醫我癖今我哭君白楊風起南陔蕭瑟
暮山烟紫歸來歸來人世如此嗚呼哀哉

許母郭太夫人祭文

幃房之秀不出閭闔逮其光顯天眷帝錫其眷維何

子孫千億如日方昇昭于四國其錫維何霞披翠翟
如川方至服之無斃亦有婦順能恒其德從夫之爵
一命而溢亦有母儀孝思維則子善子祿三釜是嚇
猗歟夫人而誰與匹既貴不驕處裕能嗇嘉隆之際
碩彥雲蒸夫子制義光于典墳爰試鸞刀惟藥惟水
夫人是時柔順利貞何以相之鷄鳴小星干將偃割
用晦其明夫子曰嗟庭樹森森三鳳矯翼將騫將騰
夫人是時爰肅嘉賓于以輔之楊氏太嫻慶由善積
麟趾振振曲江再曉花院重榮尋蒼繞膝頭角崢嶸

夫人是時歛福歸真六時薰掃彌陀一聲方期百年
爲世人瑞云胡一疾珠沉玉碎匪命不常夫人之義
留其有餘世世逢歲某風承賢胤叨與升堂拜母床
下永式其嫜倏焉聞訃有淚如漿我生既晚其羽可
望誰復世貴冲焉若藏五十餘年間里芬芳誰復上
壽脫焉若忘蓮花火開歸與西方爰薦清茗式歆式

翔

許母汪孺人祭文

興賢仁里秉節五人曾掃禿筆勒此女貞矯矯靈淑

周甲彌新邦人欽矚令典是陳將請于朝以彰德馨
一朝奄忽隣里悲辛爰薦明水具述本因淑配君子
蚤歲知名千里在御直逼其兄歷塊一蹶孤孫土塵
淑濱九死不有其身濡忍徘徊熊夢在娠爰事姑嫜
形影相隣爰諧妯娌孝友可憑匿影小樓冬夏昏晨
偏樓燕綉歲歲來馴淑義動天爰育麒麟以哺以訓
行飭照明學富五車貴比百城淑意惋惋操作彌寧
深藏處子節用儉貧四十餘年孫子振振慈孝相保
眼耳神明云胡一疾玉碎珠沉夫子別淑篋惟一經

淑別夫子南荻未嬰九原相見大義以伸迨惟曩昔
夜雨青燈如冰如雪如松如筠含笑歸泉曷瘁曷榮
鞞管嗚嗚鼓聲彭彭侍姑就窆觀者涕零他年宅里
表厥貞珉新安之裔曰汪夫人

贈尚廩丁長孺先生祭文

世道主盟盡憑忠義所以俊杰必饒意氣亦有傲岸
瞠目盱視浮雲千變情形立異自謂鐵石一朝粉碎
嶢嶢風骨首鼠可畏某視夫子可謂一致夫子論文
抉摘刻礪森乎游衍細微流注歌出金石聲滿天地

夫子論事六經鼓吹抵掌而談雷奔電掣自詫獨醒
衆人皆醉少壯立朝筮仕省秘既叅秩宗大禮攸議
陋彼鄙夫庸庸泄泄載起載蹶剛腸莫二幅巾杖屨
飄然天際惟興所適颯爽而至登高能賦忘機寡嗜
顧渚茶香箬溪酒貴獨徃獨來何營何索左招沈約
右挈錢起卷盡谿邊能馴猛虎座敞故巢神通燕子
家有青箱以承先祀曰予僉憲似可濟美東山屐利
北闕廣譽帝錫綸音稱朕尚璽公噓歸天山光夜紫
其昔事公舞雩堪比哲人其萎誰能遣此匏繫吳天

涕淚如水感時撫事長懷曷已

爲袁當時祭業師顧仲從文

惟夫子之挺露兮映王府以珠藏中沉湛而朗徹兮
苞羽翮其五章既淵源之稠疊兮試鞭影而騰驤森
武庫之刀劔兮誰擬出匣之寒光翩矯矯其絕塵兮
紛塵拂以琳琅薄入手之何粉兮馨留座之荀香司
馬蔚其門輝兮史世掌將相望陵玉樹之凌雲兮佩
文犀與蔥練衆倦形而避席兮弘虛懷以脩讓標月
指于先秦兮追正始而屹揚神超象帝之先兮思軼

雲龍之上紛竹簡而無落兮瞻鼯鼠以必對雖才女
之逸邈兮孰云造物之予懋即濩落其何傷兮夫有
所行其素位諧八音與五色兮審爾自娛于斯文笈
桃李之成蹊兮濟多士其屯雲憫溲淖之不遺兮蹇
得與于宮墻氣索莫而神沮兮夫子教予以守正毋
競進而貪婪兮毋怠荒以俟命疑義之與析兮必高
文其共賞夫既瞻之在前兮步趨焉其後矐予固知
鴛塞之不才兮納蹄躄而私獎予既協契于蘭盞兮
僥投分于針介入鼓琴以相娛兮退洗心而淘汰其

予日益而日損兮。旁通予以詩派。兼游藝與成樂兮。謂積小之致大。忽秋風之蕭瑟兮。偕三五而徘徊。凌巖嶮以望遠兮。弄潺湲而形開。雖非時俗之所急兮。苟信媮亦已焉哉。酌紅友以逍遙兮。豈壯心之可灰。帝恩覃之浩蕩兮。思啓沃之奇才。叩九閭而激詞兮。披冊裘之皚皚。守家學之雅尚兮。寧有踰于祖武帝。錫類以弘恩兮。褒先史之武伍。班僉僉于胄子兮。俟秋風而搏羽。蹇偃偻于江干兮。款款其慰予曰。朝廷之德意兮。將階之以彰國紀。旋嗻唏而鬱悵兮。喟流

光之不我與何豎鬼之擲掄兮操韞管而畫趨奎壁
忽其掩翳兮滄波竭涸而無聲悽風雨之憇潺兮日
月慘澹其光晶朗融靈而漠漠兮雕鐫脫落而沉湮
豈積美之秩妬兮何才大之不伸誰執萬古之權衡
兮誰稱千人之俊英何溘然視我若捐兮庭留空群
之汗血何使我萎絕而中傷兮空吟夫子之白雪髓
迸而淚枯兮肝鑿而腑裂義輪去去其不返兮霓罕
搖搖而路絕沙揚塊激泰山頽兮蔓草瀰瀰梁水壞
兮蘭摧玉碎哲人萎兮浮生寂寂我與做兮哀哉哀

哉

中翰劉蘊華五兄祭文

嗚呼吾兄而一往遂不返耶庚申歲晏之別江干分袂頻回白首遂成今古耶甲子深秋郵筒數語憫然慰勞亦時有鬢髮搖落之感墨蹟宛然芬人襟袖而遂爲絕筆也耶憶昔定交其時春仲其歲丙辰兄肅修銳付以忘憂予時捫心慨然莫逆我嘲兄哂兄哂我俞余自以爲子期之耳而流水高山之賞識也而余因是知兄之承先而啟後未嘗頃刻實諸懷也而

因是知兄之該達博通若河漢而無極也而因是知
兄之存心濟物若已溺而已饑之也因是知兄之肝
膽腸胃燁如虹白如雲也因是知兄之脩遠闊曠雖
復策如計然力如文伯而慷慨急難終不以阿堵滓
其清虛也而兄之自言曰予亦世人耳世人所愁何
得不愁世人所喜何得不喜予是以終日食鮮噉美
純綺文其身而余又因是知兄之所踐惟實所操惟
樸出手其心之所不能已行乎其素之所自然雖復
恣口縱談從心所欲而終無碍于世也昔昔之夜挑

燈煮茗追述曩素悵憶開沙歎歎掩涕忽復卒卒自
語若謂歲行且盡譜牒未新皇皇促促如將不及耶
余亦謂兄銳于立事所以百廢具興無負初志也而
詎謂千秋方就遂棄人間事遊冥漠耶蒸爲雲耶流
爲水耶將夢破松溲而友焦仙耶臨睨五州之絕頂
與蘇子輩卧聽江濤耶抑與尚壘雲同祠部諸兄弟
鞭龍駕霧同遊無極也耶是皆不可得而知而余所
竊見于兄者堦除之樹咫尺敷榮百歲之計枝葉峻
茂道路哽咽而心傷江鬼扶携而夜哭伊人長畢寂

冥千古而庶幾其後之勿替引之也秋風蕭颯我愴
何如不幸後死寸心猶在聊掬江水致此郵緜病不
握手沒不視含有胸無心把淚哽咽嗚呼哀哉惟兄
鑒之

王開美祭文

天啓六年丙寅五月某日社兄開美王先生疾終邸
舍訃聞崑山某寺各爲位相向設十月某日擬遷喪
既三十有幾日某月庚子某日巳丑始集同社弟某
某絮酒炙雞而爲文告之曰嗚呼幽明褒隔徒聞斯

語音容相召代有其人鷄黍沃酌于殂逝馬策慟叩
于西州下泉款款孰識范張尹班陶陶千秋永寂此
皆情至之所鍾未盡氣類之感激爾乃月落長天千
江影攝風來松外颼颼萬尋噫聚而散疇觸而哀悵
美人之在天感鬢眉之如昔豈與夫鳥飛獸走一動
而群驚水遠山長徒嗟其何及者哉嗚呼開美宛其
死矣目空千古字挾風霜傲岬不屑人憐絕能每遭
欲殺興有所會何妨單綫之欄衡旁若無人匪效鵝
鶴之謝尚二十登壇自許大雅之可作三秋游衍聊

乘熙運以躍鱗思九州之博大豈必懷夫故都攬天
漢之無窮尚使凌彼倒景一斗百篇長安市上呼我
謫仙人廡下賃春要離墓傍堪作豪士侶原夫杜陵
騷雅肇自審言仰睇太白峯高軼倫李賀江東號爲
步兵同氣藉其家範是以歸庵五字之什霧涌雲蒸
古嘒四始之風星羅電掣山陰修禊厥有宗盟洛社
賡歌尚期白首亡何地隔煙沙悵胡塵之漠漠未幾
鶴歸華表驚長夜之沉沉遂使雪堂遺清之胤迨仰
前修同鳴同氣之速有懷靡及出門轉聆邈若河山

翹首故園。堪成陳迹。所恃簣管。墨竹葉葉。雙鈞其柰。
春月啼鶻聲。聲鳴咽。嗚呼哀哉。脫帽露頂。誰剖藩籬。
漚膽披肝。誰噓爽氣。去蕪去泰。誰躡謨雅。骨竦精緊。
誰開物始。盡壘之質。誰憑廣陵之散。誰繼嗚呼。開美
宛其死矣。哀哉。哀哉。尚饗。

誥封中大夫張先生祭文

維天啓七年某月日。眷弟張某。謹以香帛楛酒之儀。
祭于明故誥封中大夫。若虛張長兄老先生之靈。曰。
夫何葭管之飛灰兮。忽大塊噫氣而揚塵。急景駢駢。

其將入兮黃河涘竭而堅冰梁木摧幹而偃蹇兮居
人躑躅而悲辛符紛下以再訃兮郵亭絡繹而披星
北涉河而濟睢水兮東抵洛陽至于溫陵親朋揮涕
而驚告兮何泰山之崔嵬而殞崩殮蒲舍壁而服玄
纁兮亦何憾乎道大之莫伸惟太淑人之惟素兮獲
鳳枕塊以俟原鴒羗星輶之馳驟兮渝河涉海而來
犇哭相向以慟地兮哀感行路之人白衣冠其濟濟
兮載圭璧以肅牲牲緬素交之愴心兮跪敷辭而薦
觥惟昔通議之樹德兮稟萬石相如之恂恂晚獲麟

子夫子兮秀眉目而神清胸羅武庫之甲仗兮指繡
雲孫之五紋破萬卷而練要兮宵賢聖以傳神騰九
萬之風斯下兮去六月而息南溟領五雛而苞彩兮
一堂憂玉而鏗金觀琳琅之觸目兮拊玉樹之森森
俄鵬翼之聯翮兮帝隆本而推恩膺初命而倭形
兮晉三命而神彌溫絢金緋之璀璨兮川善下而不
盈服故裘以徜徉兮課午夜之書聲時感激而沉吟
兮庶幾思眾其所生天眷至性而冥若通兮參藩捧
檄于涓津暨黃麻之頒降兮忽含笑而長瞑昔與夫

子連床而私試兮寧知搏風水擊不于其身暨子貴
而散車羸馬兮居然通議清白之子孫疇始終一節
兮疇恭敬而溫文疇骯髒而矜細兮疇濶視而小心
疇貴而不驕兮疇處盛而無競疇白而采終無染兮
疇玉而雕終為璞兮哲人其萎我心愴兮嗚呼哀哉
尚饗

故盡瘁金州刺史如止周公祭文

諱玄昭

吾鄉先達砥節自守以死勤事故所時有尸之祝之
憲典不朽復見我公怒焉心疚整冠肅詞叙述恐後

公昔幼孤月就螢囊賢母把荻教以義方拜辭按藻
屈其同行懸書國門拔萃友邦宮商角羽刻畫鏗鏘
秋風搏翮驚彼碧眼呦呦鹿鳴慷慨上往再蹶再奮
文奇誰賞展積開筍異香泱泱緼真不試吾道自獎
朝奉慈訓何必搏風善須憑祿曰孝與忠跪而受教
筮仕明宮振鐸秦郵廣陵朝宗清比何遜梅花一叢
帝曰嗟哉天上列宿寘之青壇民孰左右赤城百里
小試馳驟酌泉委羽仰摘橘柚五稔奏最清風滿袖
諸艱歷試出牧于滇兵戈阻截西蜀熬煎軍士脫巾

偏橋溺旗制臺借筋督餉便便五月寇靖黃平報還
忽焉聞訃五內崩裂帶星而馳呼旻泣血淚盡眼枯
幾甦幾絕風木悲吟匪消日月日月轉盼倏爾禫除
公竟歔歔永念幽居風竹煙松古近自娛性僻驚人
李杜歐虞朝政中興拜手嵩呼嵩呼轉展先慈有教
昂藏七尺豈同凡調治裝趣行抒我宿抱魏興缺守
湏此杜召 天子桐封千艘震掉奉公約東順流而
東黃頭唯唯伍伯從容漢江上下如雲蕩風假嚴休
息視彼春農以養以教刻日程功詎謂蠶鳧躁擾東

川蔓衍穴窟騷動閩南監司制逸借公仔痛劫之間
之瞠乎籲天進退維谷秦隴晏然神竭血枯今日疾
作興民罷市貴遊徹樂天胡不仁星芒夜落功成身
殞哀勤秦岳次君至性絕而後甦水漿不入扶襯南
徂搜獵手澤數卷書圖將以有為緩死湏臾道路喘
喘涕泗漣如復忝居交末宿仰忠壯偏橋之役鬼方
大創再試秦州勇氣逾狂興文之後興安孰尚孝子
勿悲典型可狀尚饗